

**Broj: 07-02-273-15/3/07**  
**07-02-274-15/4/07**  
**07-02-275-15/5/07**  
**07-02-422-08/07**

**Mostar, 27.06. 2007. godine**

Na osnovu člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine FBiH“ br. 13/04), člana 31. stav (2), člana 37. stav (5) i člana 53. stav (2) Poslovnika o radu Regulatorne komisije za električnu energiju u Federaciji Bosne i Hercegovine („Službene novine FBiH“ br. 59/04), te člana 36. stav (6), člana 46. stav (3), člana 48. stav (1) i člana 49. Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine FBiH“ br. 37/05) i Odluke o provođenju drugog tarifnog postupka br. 07-07-542-01/07 od 15.06.2007. godine, rješavajući po Zahtjevu za sticanje statusa umješača koji je u FERK primljen 25.06.2007. godine pod brojevima 07-02-273-07/3/07, 07-02-274-07/4/07, 07-02-275-07/5/07 i 07-02-422-01/07, podnosioca Udruženje poslodavaca u Federaciji Bosne i Hercegovine Sarajevo, Regulatorna komisija za električnu energiju u FBiH – FERK je, na X. redovnoj sjednici, održanoj u Mostaru dana 27.06.2007. godine, donijela sljedeći

## ZAKLJUČAK

- I. Odobrava se Zahtjev Udruženja poslodavaca u Federaciji Bosne i Hercegovine Sarajevo za sticanje statusa umješača u drugom tarifnom postupku i to u postupku formalne rasprave po Zahtjevu za odobrenje tarifa za djelatnost proizvodnje električne energije koji je u FERK primljen 26.03.2007. godine pod brojem 07-02-273/3/07, u postupku formalne rasprave po Zahtjevu za odobrenje tarifa za djelatnost distribucije električne energije koji je u FERK primljen 26.03.2007. godine pod brojem 07-02-274/4/07, u postupku formalne rasprave po Zahtjevu za odobrenje tarifa za djelatnost snabdijevanja električnom energijom koji je u FERK primljen 26.03.2007. godine pod brojem 07-02-275/5/07 i u postupku formalne rasprave po prijedlogu tarifnih stavova za prodaju električne energije nekvalifikovanim (tarifnim) kupcima podnesenim od strane Javnog preduzeća Elektroprivreda Bosne i Hercegovine d.d.-Sarajevo.
- II. Umješaču iz tačke I. ovog zaključka dozvoljeno je učestvovati u postupku formalne rasprave, iznositi dokaze, primjedbe i argumente i pridržavati se postavljenih rokova. Voditelj postupka može ograničiti učestvovanje umješača, u slučajevima kada je to za dobrobit efikasnog vođenja rasprave. Umješač ima i druga prava i obaveze u skladu sa odredbama Poslovnika o radu FERK-a i Pravilnika o javnim raspravama i rješavanju zahtjeva i žalbi FERK-a.

- III. Ovaj zaključak je konačan i stupa na snagu danom donošenja, te se objavljuje se na oglasnoj tabli i web stranici FERK-a.

### **O b r a z l o ž e n j e**

Član 53. stav (2) Poslovnika o radu FERK-a propisuje da FERK može dodijeliti status umješača licu koje dokaže direktan interes za tarifni postupak, koji je različit opštem javnom interesu, te da je umješaču omogućeno da učestvuje u postupku, svjedoči i zahtjeva informacije putem člana FERK-a ili voditelja postupka formalne rasprave. U skladu sa članom 46. stav (3) Pravilnika o javnim raspravama i rješavanju zahtjeva i žalbi FERK-a, kriterije za utvrđivanje prava i statusa umješača FERK određuje za svaki konkretan slučaj posebno, ovisno o okolnostima slučaja. Članom 48. stav (1) istog Pravilnika propisano je da FERK o zahtjevu za priznanje statusa umješača odlučuje u roku od 15 dana od dana prijema zahtjeva u FERK. Članom 36. stav (6) i članom 49. istog Pravilnika propisan je način na koji umješač dostavlja svoje podneske i na koji je način ovlašten učestvovati u raspravi.

Odlukom FERK-a o provođenju drugog tarifnog postupka br.07-07-542-01/07 od 15.06.2007. godine određeno je da status umješača u postupku formalne rasprave može steći pravno ili fizičko lice pod uslovom da podnese zahtjev za sticanje statusa umješača i da ispunjava kriterije: da ima direktan interes u postupku po zahtjevu za odobrenje tarifa ili po prijedlogu tarifnih stavova u vezi kojeg podnosi zahtjev za sticanje statusa umješača, a koji je različit od opšteg javnog interesa i da raspolaže podacima i činjenicama od značaja za formalnu raspravu u drugom tarifnom postupku koji se vodi pred FERK-om. FERK je putem Obavještenja za javnost o podnesenim Zahtjevima za odobrenje tarifa od strane Javnog preduzeća Elektroprivreda Bosne i Hercegovine d.d.- Sarajevo i održavanju formalnih rasprava, objavljenim u „Dnevnom listu“ i „Dnevnom avazu“ dana 16.06.2007. godine, odredio da se zahtjev za sticanje statusa umješača može FERK-u podnijeti do 25.06.2007. godine do 12:00 sati.

Dana 25.06.2007. godine, Udruženje poslodavaca u Federaciji Bosne i Hercegovine Sarajevo podnijelo je Zahtjev za sticanje statusa umješača u postupku formalne rasprave u drugom tarifnom postupku, koji je u FERK primljen pod brojevima 07-02-273-07/3/07, 07-02-274-07/4/07, 07-02-275-07/5/07 i 07-02-422-01/07, a kojim je podnosilac zatražio sticanje statusa umješača u drugom tarifnom postupku i to u postupku formalne rasprave po Zahtjevu za odobrenje tarife za proizvodnju električne energije, u postupku formalne rasprave po Zahtjevu za odobrenje tarifa za djelatnost distribucije električne energije, u postupku formalne rasprave po Zahtjevu za odobrenje tarifa za djelatnost snabdjevanja električnom energijom i u postupku formalne rasprave po prijedlogu tarifnih stavova za prodaju električne energije nekvalifikovanim (tarifnim) kupcima podnesenim od strane Javnog preduzeća Elektroprivreda Bosne i Hercegovine d.d.- Sarajevo.

Rješavajući po Zahtjevu za sticanje statusa umješača podnosioca i to u postupku formalne rasprave po Zahtjevu za odobrenje tarife za proizvodnju električne energije, u postupku formalne rasprave po Zahtjevu za odobrenje tarifa za djelatnost distribucije električne energije, u postupku formalne rasprave po Zahtjevu za odobrenje tarifa za djelatnost snabdijevanja električnom energijom i u postupku formalne rasprave po prijedlogu tarifnih stavova za prodaju električne energije nekvalifikovanim (tarifnim) kupcima podnesenim od strane Javnog preduzeća Elektroprivreda Bosne i Hercegovine d.d.- Sarajevo, FERK je uzeo u obzir ciljeve koje pred njega postavlja Zakon o električnoj energiji („Službene novine FBiH“ br. 41/02, 24/05 i 38/05) vezane za podsticaj za privatna domaća i strana ulaganja u elektroenergetskom sektoru, pouzdanije snabdijevanje kupaca kvalitetnom električnom energijom, zaštitu interesa korisnika sistema, kao i uvođenje konkurencije, transparentnosti i sprječavanje neželjenih efekata monopola, te obaveze FERK-a da reguliše kvalitet usluga na svim nivoima, kao i tarife i naknade koje se plaćaju za monopolske usluge u distribuciji, imajući u vidu interese i potrebe svih korisnika za snabdijevanje električnom energijom. FERK ocjenjuje da podnosilac zahtjeva Udruženje poslodavaca u Federaciji Bosne i Hercegovine Sarajevo ima direktan interes za sticanje statusa umješača u postupcima po podnesenim predmetnim zahtjevima i prijedlogu Javnog preduzeća Elektroprivreda Bosne i Hercegovine d.d.- Sarajevo, a koji je različit od opšteg javnog interesa, obzirom na usku povezanost njegovog djelokruga rada sa navedenim ciljevima i obavezama utvrđenim pomenutim Zakonom, kao i da učešće podnosioca zahtjeva u postupku može samo doprinijeti kvalitetu provođenja drugog tarifnog postupka.

Na osnovu svega navedenog, odlučeno je kao u dispozitivu ovog zaključka.

**PREDSJEDNIK FERK-a**  
**Zdenko Šimunović s.r.**